

摘藻堂四庫全書薈要

集部

欽定四庫全書薈要

集部

文憲集卷一



欽定四庫全書薈要

文憲集目錄

卷一

表賦頌詔誥

卷二

記

卷三

記



卷四

記

卷五

序

卷六

序

卷七

序

卷八

序

卷九

序

卷十

傳

卷十一

傳

卷十二

題

卷十三

題

卷十四

跋

卷十五

箴  
銘

卷十六

碑

卷十七

神道碑

卷十八

神道碑  
墓碑

卷十九

墓銘

卷二十

墓銘

卷二十一

墓誌銘

卷二十二

墓誌銘

卷二十三

墓碣



卷二十四

墓版文表辭誌

卷二十五

行狀謚議雜著

卷二十六

雜著

卷二十七

雜著

卷二十八

雜著書

卷二十九

辭

卷三十

贊

卷三十一

評操鼓吹詩

卷三十二

詩

臣等謹案文憲集三十二卷明宋濂撰濂字景濂浦江人元至正末召為國史院編修官不就後應明太祖徵官終學士承旨追諡文憲事蹟具明史本傳其文根抵醇茂為明初儒臣之冠嘗著孝經新說周禮集注今皆不傳而集中說經之文若河洛說章服辨諸篇

均有發明可以想見其所學其孔子生卒年

月考一篇推襄公二十一年十一月無庚子

正公羊十一月庚子孔子生之誤推哀公十

六年四月無己丑正左氏夏四月己丑孔子

卒之誤考証尤精惟孔子廟堂議一篇謂七

十二子但當祀於太學不當祀於郡縣其說

似乎太偏然全璧微青固無庸置議矣乾隆

四十三年二月恭校上

總纂官臣紀昀臣陸錫熊臣孫士毅  
總校官臣陸費墀



欽定四庫全書薈要卷一萬六千五百八十

集部

文憲集卷一

明 宋濂 撰

表 凡四章

進大明律表

臣聞天生烝民莫不有欲欲動情勝詭僞日滋強暴縱其侵陵柔懦無以自立故聖人者出因時制治設刑憲以為之防欲使惡者知懼而善者獲寧傳所謂獄者萬民之命所以禁暴止邪養育羣生者也譬諸禾黍必刈

狼莠而後苗始茂方於白粲必去砂礫而後食可飡苟  
梗化敗俗之徒不有以誅之雖堯舜不能以為治夫自  
軒轅以來代有刑官而五刑之法漸著其詳弗可復知  
逮魏文侯師於李悝始采諸國刑典造法經六篇漢蕭  
何加以三篇通號九章曹魏劉劭又衍漢律為十八篇  
晉賈充又叅魏律為二十篇唐長孫無忌等又取漢魏  
晉三家擇可行者定為十二篇大槩皆以九章為宗歷  
代之律至於唐亦可謂集厥大成矣洪惟皇帝陛下受



億兆君師之命登大寶位保乂臣民孳孳弗息其訓迪  
羣臣諄復數千言唯恐其有犯慈愛仁厚之意每見於言  
外是大舜惟刑之恤之義也矜憫愚民無知陷于罪戾  
法司奏讞輒惻然弗寧多所寬宥是神禹下車而泣之  
心也唯貪墨之吏承踵元弊不異白粲中之沙礫未泰  
中之狼莠也乃不得已假峻法以繩之是以臨御以來  
屢詔大臣更定新律至五六而弗倦者凡欲生斯民也  
今又特敕刑部尚書劉惟謙重會衆律以協厥中而近

代比例之繁姦吏可資為出入者咸痛革之每一篇成輒繕書上奏揭於西廡之壁親御翰墨為之裁定由是仰見陛下仁民愛物之心與虞夏帝王同一哀矜也易曰山上有火旅君子以明慎用刑而不留獄言獄不可不謹也書曰刑期于無刑言辟以止辟而民自不敢犯也陛下聖慮淵深上稽天理下揆人情此百代之準繩實有易書之與旨行見好生之德洽于民心凡日月所照霜露所墜有血氣者莫不上承神化改過遷善而悉

臻雍熙之治矣何其盛哉臣惟謙以洪武六年冬十一月受詔明年二月書成篇目一準之於唐曰名例曰衛禁曰職制曰戶婚曰廩庫曰擅典曰賊盜曰鬪訟曰詐偽曰雜律曰捕亡曰斷獄采用已頒舊律二百八十八條續律百二十八條舊令改律三十六條因事制律三十一條掇唐律以補遺一百二十三條合六百有六分為三十卷其間或損或益或仍其舊務合重輕之宜云謹俯伏闕廷投進奉表以聞臣等誠惶誠懼稽首頓首謹

言洪武七年月日具官臣等上表

進元史表

伏以紀一代以為書史法相沿於遷固考前王之成憲  
周家有監於夏殷蓋因已往之廢興堪作將來之法戒  
惟元氏之有國本朔漠以造家用兵戈以爭強并部落  
者十世逐水草以為食擅雄長於一隅逮至成吉思之  
時大會幹難河之上始尊位號漸定教條既近取於乃  
蠻復遠攻於回紇渡黃河以蹴西夏踰居庸以瞰中原

太宗繼之而金源為墟世祖承之而宋錄遂訖立經陳  
紀用夏變夷肆宏遠之規模成混一之基業爰及成仁  
之主見稱願治之君唯祖訓之式遵思孫謀之是遺自  
茲以降聿號隆平豐亨豫大之言鼓倡於天歷之世離  
析渙奔之禍馴致於至正之朝嬖幸蠱惑於中權姦蒙  
蔽於外漢網祇因於疏闊周網遽至於陵遲風憲皆為  
不捕之猫將士盡成反噬之犬由是羣雄角逐九域爪  
分風波徒沸於重溟海岳竟歸於真主中謝欽惟皇帝

陛下奉天承運濟世安民建萬世之丕圖紹百王之正  
統大明出而燭火息率土生輝迅雷鳴而衆響徵鴻音  
斯播載念盛衰之故仰推忠厚之仁僉言實既亡而名  
亦隨亡獨謂國可滅而史不可滅特詔遺逸之士欲求  
議論之公文詞勿至於艱深事迹務令於明白苟善惡  
瞭然在目庶勸懲有益於人每因天語之丁寧愈見聖  
心之廣大於是命翰林學士臣宋濂待制臣王禕儒士  
臣汪克寬臣胡翰臣宋禧臣陶凱臣陳基臣趙璘臣曾

魯臣趙汭臣張文海臣徐尊生臣黃麓臣傅恕臣王錡  
臣傅著臣謝徽臣高啓分科脩纂故上自太祖下迄寧  
宗靡不網羅嚴加搜采恐玩時而愒日每繼晷以焚膏  
故於五六月之間成此十三朝之史況往牒舛訛之已  
甚而它書參考之無憑雖竭忠勤難逃疎漏若自元統  
已後則其載籍無存已遣使而旁求俟續編而上進愧  
其才識之有限弗稱三長兼以紀述之未周殊無寸補  
臣瀛泰司鈞軸幸覩成書信傳信而疑傳疑僅克編摩

於歲月筆則筆而削則削敢言褒貶於春秋仰塵乙夜之觀期作千秋之鑑所撰元史紀三十八卷志五十三卷表六卷傳六十二卷目錄二卷通計一百三十萬六千五百餘字謹繕寫成百二十冊隨表上進以聞

致仕謝恩表

翰林學士承旨嘉議大夫知制誥兼脩國史兼太子贊善大夫臣宋濂誠歡誠忤稽首頓首上言臣聞生世而逢真主仕宦而歸故鄉此人臣至榮而至願也臣本一介



書生粗讀經史在前朝時雖屢入科場曾不能沾分寸之祿甘終老於山林今幸遭逢聖主定鼎建業特勅省臣遣使者致幣起臣於金華山中俾典儒臺繼陞右史侍經東宮供奉翰苑去歲欽蒙特除承旨為文章之首臣而次子璉擢中書舍人長孫慎殿廷序班一門三世俱被恩榮近者又荷追封祖父親御翰墨寵以雄文粲然奎壁之光照耀霄漢且憐臣年老令致政還鄉又有冠服文綺寶楮之賜鴻澤滂沛不一而足其高如天其

厚如地照臨如日月非筆墨可盡述臣誠懼誠忤稽首  
頓首欽惟皇帝陛下以布衣混一四海如漢高祖以仁  
義化被萬方過唐太宗宵衣旰食孜孜圖治欲使天下  
蒼生無一夫不被其澤雖以臣之愚陋無尺寸之功亦  
蒙寵遇如此之至銘心鏤骨誓不敢忘自度無以效犬  
馬之誠唯朝夕焚香上祝千萬歲壽及以忠勤教子孫  
俾世世無忘陛下深仁厚德而已臣無任瞻天仰聖激  
切屏營之至謹奉表稱謝以聞臣濂誠懼誠忤稽首頓

首謹言洪武十年二月十二日具官臣瀛謹上表

致仕謝恩箋

具官臣宋瀛誠惶誠忤頓首頓首上言近者欽蒙聖恩  
追贈二代許臣致仕還鄉臣自正月初六日陛辭十日  
發舟二十七日至家二月初三日詣墓所祭告昭宣制  
命龍光烜赫下燭泉壤鄉里親朋一時畢會相與嘆慕  
以謂天朝待士如此之至莫不感激思奮此皆皇上之  
大德殿下之深恩顧臣區區何以圖報於萬一臣聞古

聖人有言曰為君難其所謂難者何也蓋以四海之廣  
生民之衆受寄於一人敬則治怠則否勤則治荒則否  
親君子則治近小人則否其機甚微其發至于不可遏  
不可不謹也所以二帝三王相傳心法曰德曰仁曰敬  
曰誠無非用功於此也治忽之間由心之存不存何如  
耳臣誠惶誠忤頓首頓首恭惟皇太子殿下仁孝溫恭  
出言制行動合至道中外無不仰望而臣猶以二帝三  
王相傳心法為言者誠以為君之難也臣退居田里而

忠愛之心彌切旦夕不忘於是敢貢芻蕘之言伏望殿下察臣所言而篤行之則天下幸甚臣無任瞻仰激切屏營之至謹奉箋申謝以聞臣瀛誠惶誠忭頓首頓首謹言

賦 凡二章

奉制撰蟠桃核賦

有序

洪武乙卯夏五月丁丑上御端門召翰林詞臣出示巨桃半核蓋元內庫所藏物也其長五寸廣四寸七

分前刻西王母賜漢武桃及宣和殿十字塗以金中  
繪龜鶴雲氣之象後鐫庚子年甲申月丁酉日記其  
字如前之數亦以金飾之所謂庚子實宣和二年字  
頗疑祐陵所書既奉旨撰賦垂誠方來臣瀟謹按西  
王母獻桃事詳見張華博物志第八卷史補類中華  
言桃七枚大如彈丸遺帝五自食其二以今核觀之  
且十倍於彈丸則其實之如斗可知矣豈華出於傳  
聞而想像載之歟抑其言足信而後之好事者假托

傳會之歟不然漢武內傳所謂桃如鳧卵形圓而色青者又果何如歟復按蔡京所記尚庫有王母蟠桃核頗鉅京嘗相祐陵其見與今相符事當可徵然則傳志所載誠有不可信者歟臣敢忘其固陋製賦一篇俯伏丹陛以獻初則極其形容終則一歸於正其詞曰

炎漢六葉實惟武皇闡坤符握乾綱祀汾陰建竹宮  
叶  
仁獸在郊赤芝騰房西海獻續弦之膠弱水來燕卵之

香慶諸福之畢集思騎龍於帝鄉幸靈桃之入口傳仙  
種於下方想其瑤階露寒彤庭秋迴銀燭未掩畫屏斜  
映啓承華之秘殿眄瑤池而神騁忽王母兮遙臨托青  
鳥以傳命鬱佳氣之葱籠覲芳姿之妍靚於是玳席初  
延霞觴屢傳蘭辭吐兮韻人縹袂舉兮高騫紫雲之輜  
輶暫駐九微之燈火猶燃乃啓錦幃乃濯翠蓮乃出桃  
實獻于帝前味甘醇而如醴色含腴以不乾鸞刀割蜜  
神液流泉上茲華池身輕欲僊將懷核而種之斲上林



之寒煙王母微笑塵世易遷倘花實之並見歲屢閱於  
三千唯紫府之列真視滄海於桑田彼窺鳥牖之小兒  
尚奚測夫幽玄斯核也匪鑄而成非陶而凝藉五行之  
亭毒資六氣以流形鄙瓠犀之脆薄並玉質之堅貞爪  
之不入叩則有聲知何年之中析存半壁之晶瑩俯貼  
金盤巢蓮之龜仰承玉露常滿之杯銳首聳兮尖岑豐  
下檐吐火切狹長也兮墜星衆皺感背文之繡一窪暈面色之  
頽荷盤欲展蚌甲未扁藏仁之跡猶在含肌之罅如生

函肉好之隱約園合線之交層龜鶴軒翥兮顯象寶章  
絢爛兮金明鳳占鸞彛同歲真於天府星形月魄挾瀨  
氣於蓬瀛嗟夫自昔仙靈恍惚難憑出無入有變幻莫  
停稿類盡兮已園東如瓜兮漢庭恣燕薈之方士騁詭  
辯之奔騰瞻雲路之咫尺恨凡骨之難登以雄才之蓋  
世甘昏溺而不醒至若建章月淡甘泉風冷銅莖中峙  
仙掌高擎望璣輪兮不來徒馳情於窈冥苦白日之易  
短兮竟莫制於頽齡核雖存而人則逝兮悲秋風於茂

陵矧宣和之繼軌兮慕鼎湖之龍升托青華之帝子設  
神霄之玄稱何殷鑒之不遠踵覆轍其相仍天啓皇明  
真人龍興順堪輿之大化調陰陽之至精道德行兮即  
龍虎之丹顯忠信昭兮勝鉛汞之功宏以九州為仁壽  
之域躋兆民於喬松之朋神機流浹太和薰蒸指佞人  
兮草生屈軼齊氣朔兮階秀堯冀視區區之遺核初何  
繫乎重輕此所以革往古之荒唐法唐虞以作程也歌  
曰桃有核兮大逾掌厯十齡兮多惚恍慨靈仙兮勞夢思

誰見崑丘兮紫芝長真人出兮海寓寧禮樂為冠兮仁  
義作纓簫韶九成兮鳳凰鳴青鳥不敢徠兮幻說清千  
秋萬歲兮永長生

竊記徽宗本紀宣和元年己亥二月庚辰改元遂易  
宣和殿為保和殿至四年壬寅夏四月丙午詔錄三  
館書置宣和殿及太清樓秘閣始重稱宣和今視核  
上之字刻于二年庚子之甲申月丁酉日乃不書保  
和而猶襲宣和之名此固不可不疑况丁酉日屬庚

子歲癸未月之終今復隸之於甲申月之首尤有不  
可得而致詰者頗意此核非漢武時物字亦非宋祐  
陵所書雜書所載海外之國多大桃雖不可盡信或  
者得其遺核特依倣而托之者歟然濂年已邁舊學  
皆廢忘未必其言之足徵也姑書之於此以俟後之  
君子云

崆峒雪樵賦

有序

劉君宗弼家于贛之崆峒山陽學贍而文雄嘗擢進士

第入教成均出仕浙江部使者之寄聲光已赫然矣君  
乃退然弗居方以崆峒雪樵自號其殆顯幽一致者歟  
非賢而有德者盖弗能也君間請濂賦其事雕蟲篆刻  
之學老且忘去黽勉操觚雖用賦體而比物成義為多  
君之西還或歌於清泉白石間山靈聞之未必不輟然  
一笑也其辭曰

伊空同之拔起兮鎮嶠南之靈區翠旂續其蕩空兮播  
灝氣之蕤綏章貢挾以比流兮盜土脈之滋腴穴遙通

於龍翁兮勢蟠亘於鬱孤信地維之與宅兮為靈真之  
所都則有白鵝羽人黃唐丹士闢玉為房鑄金成黍仰  
青帝之布帷撥赤霞而啓筭悼下土之至濁凌剛風以  
逕度惟彭城之僊子兮式爛柯之遺軌謂靈爽之可觀  
兮意翩翩而遐舉裘翦鹿肥之花屨約芝田之薤巾割  
湘雲之枝輦點彩鷁之尾傷胡麻之未飯愛白石之堪  
煮踰洞真之石扉借修月之寶斧期緌生之來臨兮庶  
綠文之可授于時玄冬屆朔氣交水腹堅金莖高二鶴

夜語獨烏畫韶弄六花之聚白合溟滓於空寥幻九清  
之秘景闢太素之神苞奪人目精兮若流水翻空而不  
定一白無定地兮如爛銀炫耀於霜臯瓊林玉樹疊穎  
聯條柯頰亡於春綠蘄巧綴於晴梢乃陟瑤磴乃依冰  
樾膚迫寒而生鱗指屢僵而弗屈丁丁許許不遺餘力  
已枯成采方長不折玉屑隨聲而輕墮霜莖倚雲而初  
積束以九真之赤藤附以千年之苓魄既逍遙而永歸  
忘蕉鹿於今昔歌曰我采我樵兮大濛之野萬樹瓏璚



兮玉光照夜孰能相從兮與霓旌而俱下於是築石竈  
緇金經養神火煉黃庭永生水虎之窟鉛出火龍之局  
液承太乙之珠機運元華之精憑乾坤之卦券植鄴鄂  
之丹城建伐毛而洗髓致陰爍而陽凝種芝於瓊玉之  
山折桂於廣寒之庭領衿佩於橋門集鵷鷺於王庭白  
簡霜飛繡衣春明近一山而持斧使九夏之生冰迺乘  
風而來歸兮於瀛洲之先登隔人間之風雨兮遽真凡  
之異程至若西隣之子沈酣羶葷屏龜香曙笙火花春

葆階舞楚銀館歌秦黃塵迷南華之夢樊屣咄東郭之  
貧樂鍾鼎之遺艷厭烟霞之近醇尚父釣渭阿衡耕莘  
或封齊於東海或致君於華勛齊出處於一塗操變志  
於屈伸世續紛兮麗以新蠟代薪兮傷芳辰翻海水以  
為霖兮曾莫濯夫游塵孰不化為胡燕兮依華穰之飛  
文丹禽鳴夫空谷兮亦寥寥之一聞彈樵歌之逸響兮  
寄綠綺於秋旻歌曰若有人兮在蘭厓止白虎為使陟  
崇巘止皓毳迴颿敷天葩止虛白內朗絕纖瑕止仁斧

義斯龍錫鳴止鵲膏匪施痂弗形止剪彼薪擣扶柏松  
止養賢大鼎熟以烹止天下為公大道行止遡風屹立  
思盈盈止

頌凡八章

平江漢頌有序

天命皇上為億兆生民主旌麾所向悉臣悉庭初以軍  
旅之師興濠泗間遂撫淮南平江東攻浙東西下之版  
圖所入方數千里定都江左發政施仁戴白之叟垂髫

之童涵泳至化皞皞熙熙如承平時于時陳友諒據有  
江漢之地僭居大號賊殺其主大脩蒙衝虐驅烝黎如  
蹈水火不自度力又集蜂蟻之衆直傳豫章三月不解  
皇赫斯怒乃召羣臣于庭而告之曰陳虜不道敢屢予  
侮昔者蕩搖我邊方侵軼我姑孰伺偵耻慶切我金陵  
賴爾一二臣隣之力攻而敗之予亦親覆其穴巢中宵  
竄走假息武昌予不忍追殲之冀其悔禍以自逭於天  
刑癸卯之夏乃復園我豫章是其凶德無厭自取殄滅

此天亡之時天之明威予不敢不順唯爾熊羆之臣不

二心之士尚弼予以成厥功羣臣曰都於是右丞臣達

叅知政事臣遇春帳前親軍指揮使臣國勝同知樞密

院事臣永忠臣通海備厥戎器簡厥师徒以俟七月癸

酉上躬擐甲胄禡

師祭也

纛龍江帥樓船數百蔽江而上

陳虜大膽解圍而逃丁亥與我師遇鄱陽湖之康郎山

戊子上午舟師為十二屯命達遇春永忠突入虜陣呼

聲動天地矢鋒雨集砲聲雷鉤波濤起立飛火照耀百

里之內水色盡赤焚溺死者動一二萬流屍如蟻滿望  
無際已丑焚偽平章舟刈戮餘二千卒卽復酣戰虜將  
張定邊素號梟猛上親禦之將士皆死戰歷一二時遇  
春等左右夾擊殺士卒無算張中天百餘而退潛保鞋  
山不敢吐氣我師亦據湖口扼彼喉衿列柵南北江岸  
置火筏中流水陸嚴戒以候其發八月虜食盡遣舟五  
百艘掠糧都昌又為我大將所獲壬戌虜計窮冒死突  
出將士趨九江上命諸將一時俱合其大戰如戊子自

辰達西督戰益急友諒中飛矢斃於舟中癸亥降其衆  
五萬餘上命釋之不戮一人凱歌而旋舳艫相銜旌旗  
飛翻不疾不徐委蛇而來萬姓歡迎俯伏道左山川草  
木皆有喜色告廟飲至行當論功賜遇春田若干永忠  
田若干其餘將士賚金繒有差臣稽在昔曹操治水軍  
八十萬來攻孫權而周瑜黃蓋敗之於赤壁苻堅發長  
安戎卒六十餘萬騎二十七萬以侵晉而謝玄謝石敗  
之於淝水然赤壁不過一焚而走淝水亦不過軍亂而

奔初未嘗大戰也而史臣具書之以為千古美談矧今  
湖口之捷血戰累日天地為之晦冥日月為之無光山  
河為之震盪其神功駿烈炳耀鏗鉤與天無極較之三  
國未足多讓而歌咏不作非甚闕典歟臣謹備著其事  
撰為頌詞一通以俟太史氏之采錄云其詞曰

天眷有德實為哲皇肆其神畧以靖寇攘義旄東指  
罔敢弗恭風烈虎嘯雲游龍驤長淮既歸江左攸屬  
浙之東西樹侯置牧乃建國家以奠南服以懷中原



以控西蜀蠢爾小醜敢讐大邦集其克頑鋒蝟斧蟾  
輕涉我疆以跳以踉亦既剪刈僵骸覆江海齊六軍直  
傾其穴釋而勿誅俾自懲刷闔胡不然復豕而噬翹其  
蟲臂當吾車轍皇明震怒歷告在廷是決不悛命將往  
征爾選舟師爾整甲兵漕爾糗糧各罄爾誠搖光在中  
夷則之月禡牙江濱皇秉鉞以誓以戒以速其發紀  
律精明飆火奮激旟旐揚揚解漢江切艘將將矛戈洸洸  
鎧胄明明載怒載厲載飛載颺雄威所吞已無荆湘既

與虜逢大呼衝擊藥騰螯駭星流火戰虐蝕電奔巨轟  
雷劈殺氣冥濛不辯咫尺矢鋒所貫什伍聯聯縱橫交  
紐命隕弗顛攢桅湊攢筍束蝟編流尸塞川舟行弗前  
虜魄既褫扶創而逸聚于湖奧僅存喘息我方植柵江  
之南北火筏在流掩蔽如翼越歷四旬飛走遂窮將冒  
萬死以絕其衝我師見之干櫓如龍似兔之走而鷹之  
從酣戰六時由辰達酉僕姑矢名也一發殪此酋首貫睛  
及顛仆若枯柳大憖既除餘不能醜遮相告言我誠不

扶我革我頑我歸至仁誰謂培塿可高嶙峋再拜稽首  
來降來臣皇曰俞哉汝俘予受宥汝弗劉予汝父母汝  
凍予衣汝飢予哺昔何昏迷今始撤郤奏凱而旋騎吹  
鬱搖形於樂歌節以鐺饒飲至于廟頒賞于朝帛堆其  
家肉登其庖都人聚觀舉手加額或嘆或謠有聲嘖嘖  
干戈相尋匪一朝夕自今昇平可坐而策惟皇神武動  
則克之羣策盡屈四方式之惟皇寬慈降則釋之義聲  
動盪疇能敵之惟皇明斷遇事即決洞見千里不隔一

髮所以四征成此駿烈小大畢朝孰敢肆孽在昔赤壁  
泊乎合淝事以幸集尚傳策書況茲之功俊偉赫煥揆  
古無讓可無咏詩臣雖微賤文字是職對揚皇休并獻  
臣臆三代以還用仁興國皇宜遵行永作民極

膏露頌

有序

洪武二年冬十月十有三日甲戌膏露降于乾清宮後  
苑蒼松之上皇帝勅中官折示禁林諸臣光潤如酒凝  
結如珠肪白飴甘彌布松柯馨烈之氣鬯達左右勃鬱

淋漓薰涵太皞天休震動中外嘆嗟又明日丙子上御  
外朝左丞相宣國公臣善長帥羣臣稱賀上若曰甘露  
之降載在往牒然休咎之徵當以類應朕惡足以致斯  
卿等尚明為朕言之叅知政事臣稼對曰聖人之德上  
及太清下及太寧中及萬靈則膏露呈瑞陛下敬恭天  
地輯和人民故天不愛道而嘉祥徽顯也起居注臣觀  
對曰帝王恩及於物順於人而甘露降陛下誕寬民賦  
衆庶驩豫底于牧寧神應之臻職此故也翰林侍講學

士臣素對曰王者敬養耆老則甘露降而松柏受之尊  
賢容衆則竹韋受之今露降于松則陛下養老之所致  
也宜以制幣策告宗廟頒於史館以永億萬年無疆之  
聞上情存損挹皆推而不居言既已丞相帥其班以退  
翰林學士臣瀛竊伏自念忒北有星名為天乳若明而  
潤則膏露下焉王者德格於上恩覃於下靈氛充牣秘  
祝斯甄此天人感應之常理也欽惟皇上興自臨濠匹  
馬渡江十五年間遂成帝業天瑞育滋不一而足彩霞

成鳳卿雲聚繡赤鳥飛翔白兔俯伏瑞蓮並蒂嘉禾孕  
文實繫天之所命非人力所致而自至者今又覩茲聖  
徵則其德洞淪冥功成不宰三瑞沓至千休滋彰有不  
期然而然者矣雖然傳有之受命不于天于其人休符  
不于祥于其仁所以孔子之作春秋祥瑞不書而有年  
則書豈不以天道元遠難知而人事之為可徵者乎皇  
上以天縱之聖留神至治以得仁賢為瑞以五風十雨  
為祥視彼前代植金莖以承液夸嘉瑞以紀年者未嘗

不指以為戒則其英明之識超絕之智卓冠百王為法萬世是宜美盛德之形容播諸樂歌被之管絃以示聖子神孫於無窮云其辭曰

上天降康甘露瀼瀼布於下方凝於休祥其祥伊何靈氣孔多有甘者液載仁惟澤潛靈是錫誕皇之德天地相合鴻休翕集厭厭浥浥紛紛密密匪隨日以食兆厭聖徵如卿之雲如景之星如日之重輪沖和氤氲以文我太平惟皇之聖貞符自應不卑而流不高而迎第祿之



攸成惟皇之明貞符爾承不歆而傾不恢而盈蒞祿之  
攸寧休慶之即四國之式有濯厥聲耀于千齡

嘉瓜頌 有序

皇明式于九圍德漸仁被和氣薰蒸靈物效祥乃洪武  
五年夏六月嘉瓜生於句容張觀之園雙實同蒂圓如  
合璧竒姿分輝紺色交潤誠為曠世之產壬寅京尹臣  
遇林函以玄匭圖其形于上移文儀曹請以奏聞癸卯  
尚書臣凱等奉瓜以獻時上御武樓中書右丞相臣廣

洋左丞臣庸同知大都督府事臣英御史中丞臣寧翰  
林學士臣瀛咸侍左右天顏怡愉重瞳屢回良久乃言  
曰徵之往牒其事云何丞相奏言漢元和中嘉瓜生于  
郡國唐汴州亦獻嘉瓜禎祥之應有自來矣陛下勵精  
圖治超漢軼唐故天錫之珍符太平有象實見于茲上  
謙謙弗居然而靈貺之臻復不可不承乃詔內臣實諸  
乾清宮翌日甲辰薦諸太廟臣瀛退而思之夫瓜蒌  
切草實在地生之屬也其蔓遠引其葉阜蕃諸傳有之神瓜合

果力

形表縣縣之慶此固兆聖子神孫享億萬載無疆之祉  
況瓜之所出本於回紇中爾討而獲之故名爲西方今  
皇上令大將軍統師西征甘肅西涼諸郡俱下而瓜沙  
已入職方行見西域三十六國同心來朝連駢入貢大  
顯叶瑞其又不在於茲歟然而異畝同穎周公作歸禾  
之篇三秀合圖班氏有靈芝之歌矧此嘉植含滋發馨  
昭宣我神應焜煌我王度寧可喑於金於甘二切帝極無聲默而遂  
已乎顧臣駑劣不足以美盛德之形容謹上其事願宣

付史館以備實錄復繫之以頌頌曰

乾道載清坤維用寧保合太和發為休禎句容之墟物  
無疵癘神爪挺出殊實同蒂瓜孰非單此合而生二氣  
毓質雙星降精蜜房均甘冰圭競美明月重輪彷彿堪  
媿豈無賓連產於戶傍疇若茲瓜協瑞聯祥亦有華平  
張翠作蓋疇若茲瓜交輝映彩其兆伊何蘿圖繇延西域  
既柔德冒八埏羣臣曰都載拜稽首神休滋彰天子萬壽  
粵從啟運靈貺疊甄兩岐麥秀合樹孕蓮矧此貞符近在

輦轂王化自邇遠無不服帝曰吁哉朕猶慊然瑞當在  
人物胡得專使物為祥宜獻清廟曰我先人積慶所召  
孰瑞不矜帝則弗居唯親是思我民之徒以實應天斯  
乃盛德小臣作頌以示罔極

鳳陽府新鑄大鍾頌

有序

皇帝既正大統建都江表德綏威讐萬邦咸臣用羣臣  
奏臨濠為龍飛之地賜名曰鳳陽南北民大和會百族  
錯居動十萬數然而物大而盛不假器齊一之無以嚴

昏旦之禁乃詔江陰侯吳良監鑄大鍾以定衆志以裨  
治化侯之受詔遣使者至富春山中徵金工何成諭以  
天子明命即日帥其屬十六人以從相地鳳陽城東三  
里搏泥成範盡其銑角衡之度侈弇為良篆帶以方侯  
其燥剛始穿一十又三鍊青赤銅六萬五千斤筮以洪  
武乙卯冬十一月己巳蒞事厥明侯具法服以牛一羊  
一豕一祝告先治之神禮既成素籥咸興鼓動風氣炎  
光赫曦上貫霄漢絳液既澄氣憤雲洩循竇而入肅肅

有聲陽施陰凝勁質斯具越二日辛未乃發復取牲血  
塗其罍隙以厭除不祥鍾高十六尺有五寸厚六寸徑  
十尺有五寸圍三十四尺有奇混融其輪圓焊燧其容  
輝信技殫於人巧妙奪於神功者也於是營構層臺副  
以箕簾聚千夫之力鉅絙而登之一杵之撞隱隱闐闐  
雷旋電奔震撼太虛遐邇聞者靡不聳愕會瀛卮從青  
宮幸鳳陽親觀盛美侯遂請瀛為之頌瀛聞先王之世  
金部有七黃鍾乃樂之所自出而景鍾又為黃鍾之本

所謂景鍾大鍾也其受至於九斛而止律呂由是而應  
陰陽由是而均夫豈細故也哉秦漢以來寢失古法小  
鍾或數尺大鍾或容千石皆不本於律度今我熙朝稽  
古右文定於中制宣導天地孚洽神人中和所致嘉瑞  
畢協增拓化原亦於是乎有賴非特嚴昏旦之禁而已  
濔待罪國史以文辭為職業義當發揚蹈厲以鳴國家  
之盛侯之有請不敢固辭頌曰

維天穆清鼓以雷霆維帝濬哲法天之烈大鏞斯揭元氣



噴洩睠于濠梁真龍飛翔乘陰御陽洗濯八荒神物攸  
起是為帝里從者如雨於焉萃止物大而豐往來憧憧  
節之以鏞罔敢弗恭乃飭鳧氏乃具爐錘乃烹乃鬻化  
金為水赤氣夜明如日之升流亟而頽入竇有聲彬彬  
斐斐功同神鬼不鈕不鍤輪圓順軌既啓其型敢愛斯  
牲塗鬻禮成榮光如星千夫齊力臺構懸植交往孔奭  
載考載摯宅兮囹圄觸兮賁賁摩乾盪坤以警昕昏發  
攄靈氣昭融品彙物無疵癘年穀攸遂博碩而龐聲與

天通拓美集祥惠于家邦惟皇建極福之敷錫制器有  
赫式和民則稽樂之原鍾實為先律呂以宣功垂不刊  
小臣作頌有美無諷爰咨于衆是傳是誦

擬晉武帝武功頌

有序

惟咸寧五年冬十有一月皇帝將舉兵徂征乃集多士  
于庭而訓之曰惟皇天孚佑有晉俾克君臨萬方爾萬  
方有衆罔敢有肆厥志朕猶夙夜祇懼若將墜于深淵  
唯恐一夫不獲以越前王彝憲商書曰民非后罔克胥

匡以生后非民罔以辟四方朕曷敢荒寧今孫氏皓舍  
我民弗靖惟酒暨色淫酗無厭大開苑囿起土山樓觀  
殫極工藝肆厥威如虎狼羣臣有正視者輒殺無赦人  
怨神怒皓有耳若罔聞知則亦弗畏天降威命上帝震  
怒集厥命于朕躬不敢不正敢用吉玉宣璧昭告于上  
天神后帥爾有衆底天之罰爾伸爾為王子國之休戚  
與爾同之爾督徐州諸軍以出涂中爾渾戮力王室簡  
在朕心爾督揚州諸軍以出大江之西爾預夙以嘉謨

告朕朕極不忘爾尚克踐前言以成厥勲邢州諸軍爾其督之以出江陵爾濬爾作大艦欲有事於皓多歷年所今維其時非爾弗克終厥圖並梁諸軍爾其監之以下巴蜀爾彬帥其部曲以從爾奮爾戎世號忠貞各將爾師以出夏口以出武昌爾克為使持節假黃鉞大都督以冠軍爾濟副之嗚呼爾有衆脩乃干戈峙乃糗糧齊乃卒伍勿喪厥紀律惟爾賢往敷朕威靈越厥君臣宜執俘之獻于大廟勿大肆殺戮惟爾賢嗚呼朕豈有

愛于皓土疆閔我民罹辜誕以爾多方殄殲乃讎爾尚  
兢兢懷保若撫馭離兵戎所指弗使致厥傷俾朕膏澤  
布於下民時乃功爾不聽朕言朕則孥戮女爾其念哉  
太康九年春安東將軍渾出橫江所向皆克二月龍驤  
將軍濬克西陵鎮南大將軍預遣將渡江自進克江陵  
沅湘以南諸郡皆望風送印綬預分兵益濬建威將軍  
戎遣將與濬合攻武昌降之三月濬以舟師入石頭皓  
面縛興觀詣軍門降克州四郡四十三戶五十二萬三

千兵二十三萬夏四月賜皓爵歸命侯遣使行荆揚除  
皓竒政詔增充渾邑八千戶進渾爵為公濬輔國大將  
軍預戎皆封縣侯諸將賞賜有差以伐皓之役實始於  
鉅平侯祐祐既卒策告其廟封其夫人為萬歲鄉君食  
邑五千戶復詔博士臣某刻石紀功昭示萬世子孫以  
紹有晉無窮之基弗敢壞頌曰

煌煌有晉寵綏下民惟皓不恭據彼海瀕殘虐是逞若火  
四焚帝怒斯赫命將徂征龍盾虎旗昭耀日星士氣如

虹吞厥南土長江天塹一朝飛渡固不震驚流汗浹背  
豈伊神武自天而墜帝命將臣汝戒汝師汝敵則劉降  
宜舍之皓既面縛餘敢不釋萬里雖遠天威咫尺青蓋  
委蛇入于洛中夙發其祥昭此武功皇華載遣六轡耳  
耳誕布陽和以消陰殪旋乾轉坤六合一家文恬武嬉  
渾渾無涯有功者賞載盼載錫赤芾桓圭帝不之惜惟  
帝神武能屈羣策拓開蠻荒揭此日月帝德流衍頌聲  
斯播授之樂師以薦郊廟

擬薛收上秦王平夏鄭頌

有序

粵武德四年秋七月朔記室薛收頓首再拜言仰惟秦  
王殿下龍興晉陽佐我皇帝起義兵以龕定禍亂金鼓  
一振罔不臣順唯鄭王世克夏王建德昧厥大命侵牟  
我邊垂刈劉我烝人鈔掠我玉帛干戈之相尋殆非一  
朝一夕皇帝震怒詔王督諸軍伐鄭遂敗世克于穀水  
進圍洛陽建德不思自靖凶德叅會將兵十萬來救王  
帥諸將酣戰破而擒之於是世克智窮援絕率羣臣詣



軍門降王至長安獻俘於太廟行飲至禮詔斬建德於  
市免世充為庶人徙于蜀中大赦天下天下萬姓驩欣  
舞忭以為皇帝之睿謨雄算王之戎功駿烈皦皦乎不  
可尚已收備在戎行親瞻制勝料敵之奇進退擊刺之  
雄耳目怖駭若臨鬼神雖淺劣無識不可無歌詩以鋪  
張鴻休謹撰平夏鄭頌一通以獻庶幾昭示萬世以宣  
有唐之聲烈以著王業之艱難云其辭曰

真王挺生宅靈孕奇噓陽吹陰宰于化機精神所

被物無不綏皇帝興兵以遏亂隋王左右之神運天  
施或獻奇謨食若元龜或賈拳勇力如虎貔雄吞八極  
易若拾遺如鼓迅颿泱泱四來降燕帖魏踣秦以隳金  
鼓之下孰能慢台維此二豎曰夏豎鄭據河北南兵辟  
弓勁勢成鼎足力與我競夏陷黎陽思百其勝衛滑齊  
兗蹂踐莫定鄭取汴亳奪我藩屏封豕長蛇貪噬益橫  
況於官城大設坑穽四周削起峻若甌甌忌則陷之毀  
宗滅姓怨氣塞天凝為祥眚人之孔哀其何能竟皇帝

曰嗟我人何辜勅汝秦王汝亟是圖汝敕汝甲汝張汝  
弧汝簡銳驍東傳其都王拜稽首禡牙出徂旌旄飛翻  
士卒嘯呼曰爾萬寶爾疾而趨扼其龍門毋追虜誅曰  
爾德威視敵若無圍厥河內批其大軋曰爾君廓爾震  
鼓桴控彼洛口以絕餉輸屢戰屢克王乃向洛移軍青  
城壁壘星錯虜薄穀水柝以虎落王曰爾遁爾急往角  
我引騎南以褫其魄靈威莫抗虜漸退却橫戟長追如  
鼠入寨掘塹而守朝鼓夕柝不日成擒以潤鼎鑊洪爐

熾炭何金不鑠夏人卒狂稱兵黨惡其旅若林誠可怖  
愕王曰靖哉爾衆勿搖虜卒既愾虜將且驕虜命當傾  
決於今朝莫匪上天欲逸我勞使發一矢中此兩鶚咽  
喉之門實在虎牢吾往斂之短兵爾操且行且餌伏銳  
于坳伺虜深入乃與死鏖虜因大誓布屍滿皋進退維  
谷更動疊騷偵吾牧馬將齧而逃王乃濟河南臨廣武  
駭牝如雲留彼弗取虜果來迎列柵牛口我閑弗出自  
辰達午虜氣既退竭欲走王謂士及爾整部伍爾將

梟騎突此羣醜矛進而翼截其兩肘會虜方朝顛倒失  
序震霆方驚不及掩耳擊刺從衡龍飛熊吼天目為黃  
塵起如霧正戰方酣王出以奇爾知節等卷旆而馳旁  
繞虜陣張我虎旗虜衆惶駭奔如流澌相彼酋首欲絕  
而西神槩一指顛若墜尸王叱武威執而縛之囚示鄭  
人鄭人曰噫我援已絕我力莫支我肉我袒牽羊以隨  
有餘者孽亦復來歸奉璽再拜冀免殲夷乃獲乃俘振  
旅而復王被金甲懸厥魚服遠而望之有光燭煜大將

森衛後先聯屬鐵騎萬匹旁陣羽纛鼓吹颯沓節以金  
鐃清廟有赫上與雲矗陳俎奠爵邁豆嘉肅既俘以獻  
且拜且祝祝已飲至列筵如竹醇酎川流精穀林簇鳧  
鷖既醉咏歌相續皇帝曰嗟竇實弗恭稔禍濟惡厥父  
用允當梟其元以令醜克充罪固殷悲衆禦攻待以不  
死徙寘蜀邦我人實煩轉輸是共或居遐裔久阻寇封  
惴惴自保息屏足重宜行給復式寬其庸復赦宇內以  
示大同丹鳳銜詔無遠不通宏宣睿澤丕昭仁功萬方

有言如郤斯撤昔也戰爭連城喋血蒿萊千里人跡殆  
絕今也恬嬉寧爾家室盡斂戈矛化為襁褓人和既滋  
天休當發山出器車庖形瑞芝騶虞在郊苞鳳巢穴黃  
龍舒采白鳥振繁無間朔南聲教孚浹視彼梁楚千鈞  
一髮定知來朝不煩斧鉞天生烝人常代愴囊必眷有  
德以綏以攘簡策所紀更僕莫終徵之秦漢厥事孔明  
羸政肆虐虎視域中踐華因河為固自防祠狐一鳴亂  
如沸羹六國復興各自立王籍起會稽中號最强啞啞

叱咤萬夫膽喪劉季斬之不翅犬羊鉅敵一鋤寰宇乃  
康強隋比秦尤瀆天紀諸桀援戈聚如蜂蟻不有靖之  
代何能治惟帝明睿乘運而起惟王輔之以臨四海黃  
鉞白旄剪薙不軌無堅不破無險弗砥夏鄭既夷治平  
可致揆之炎漢睽芳儷美赫赫神功可昭萬祀收在戎  
行躬瞻鴻偉敢揚頌辭以告太史

豫章鐵柱頌

有序

豫章郡鐵柱二旌陽令南昌許遜敬之鑄以鎮蛟者也



郡地濱于江水蟲騁妖故民多江禍旌陽與西安吳猛  
世雲用正一斬邪三五飛步之術追殲其神於長沙復  
懼遺孽淳興使物冶鍊厭其窟宅一在西山雙嶺南埋  
沒已久一在牙城南井迄今猶存柱出井外劬尺下施  
八索謂能鈎鎖地脈云唐咸通六年節度使嚴譔來為  
郡將發視之未及咫烈風雷雨江水暴溢譔恐而止其  
見於道家書者如此漁竊聞之周有壺涿氏掌取水蟲  
著欲殺其神則以牡樺牛貫象齒而沉之則其神死淵

為陵神謂龍罔象之屬也古蓋有其術矣矧單陽則飛  
制以重陰乃伏而不動鍊陰而蛟陽者也斯柱之建其  
亦沉樺象之遺意與於戲豫章之民與蛟不兩立微旌  
陽西安民其魚矣瀛雖不敏謹徇郡守某之請勒文柱  
下以頌神功於億萬載頌曰

南昌鉅都蛟孽所庭味攪波譎旌運濤縈天誅默驗腥遏  
僉徵沈竈龜產蝕臭泓成靈伯應歷鬼憲宣刑獄錄三辰  
斗劍七星揮斥雷戰剗割霆升河青黑廓川液紅星軌

天設鎮冶金建楹祝融主燄閼伯司型八神錫羨五宮  
儲精上旋圓樞下挺方局溟妃捧鑑淵后持衡颺笙鶴  
瀨月吹鳬汀仙於週紫童即流青玄勲潛沕素牒晶熒  
龜山鐵絙龍鼎文銘翊扶鴻宰幹運清寧泰山可礪靈  
柱弗傾

三老圖頌

有序

浦江鄭氏以孝弟為政一門五十餘室不別槃案而飯  
者暨三百年靈和克物發為祥徵三壽作朋形於同氣

孟曰伯陽父年七十有二叔曰仲德父年視孟而縮其  
四季曰仲舒父年比叔又劣其五惟是三老人者身載  
明德聿昭前聞天休滋錫精神熙康羣從子姓趨翼乎  
後先仁聲義聞流行於倫類誠可謂御享百福而綏有  
遐齡者矣濂竊聞之南極有老人之星占者謂其光明  
潤則下多壽考是則天人之間氣化乎浹同流上下閱  
世靈長似若不偶然者況於孝弟之家通於神明者乎  
宜其大瑞之鼎立景貺之川臻也濂也不敏覽圖興嗟

斯頌之所由作其辭曰

降福何徵非景之星非雲之卿非三秀之榮鍾我壽朋

大冠緇衣載肅其儀其神孔熙其樂孔皆

叶

燕居之耽

時盍其簪如鼎之安如星之叅協數于三孰不式且瞻

旌門有恤孫子之飭有百斯集雅雅魚魚振振蟄蟄或

馮或翼弗徐弗亟唯步武是式歲時宴饗

叶

肆筵于堂

籩豆大房曰殺羔牛其醪苾芳鐘鼓喤喤笙簧洋洋多

士錚錚更獻壽觴祝鯁于前執醕于傍人士來觀有嘆

有言維此旌門德義之尊維此壽朋景福攸臻積之既  
蕃受之弗諼錫羨于後昆其羨之都孰侈孰舒孰形匪  
圖古亦有諸其年曰耆或至于期頤是繪是摹儷美而  
同趨九藍之山有石巖巖曰麟之水其流疊疊眉壽無  
有害與之同體壽俊之良髮素而眉龐弗祿具慶叶流  
榮于鄉匪榮于鄉實邦家之光洪武十年七月望日前  
具官宋漁述

詔凡一章

奉制諭安南國詔

春秋大義亂臣賊子在王法之所必誅不以夷夏而有  
間也向者安南國王陳日烿薨我國家賜以璽書而立  
日賢為王今所上表章乃名叔明詢諸使者日賢為盜  
所逼悉自剪屠其羽翼身亦就斃此皆爾叔明造計傾  
之而成篡奪之禍也揆於大義必討無赦如或更弦改  
轍擇日賢親賢命而立之庶幾可贖前罪不然十萬大  
軍水陸俱進正名致討以昭示四夷爾其毋悔

誥凡五章

給事中安統除兵部尚書誥

兵部司馬之職尚書法從之官古不輕授今難其人蓋  
戎務之出入馬政之弛張莫不繫焉非有奮厲之才練  
達之知不足以奉揚威武毘贊機密者矣具官安某粵  
自蚤歲有志事功自北而南在朕左右及其給事內庭  
論思獻納之益亦時有焉夏官之選惟爾之能然以一  
座之貴朕非輕以畀人者也爾尚一乃心力以報朕所



以見知之意嗚呼惟秉義守正則可以謹科條惟趨事赴功則可以行邦政尚思自勉服我訓辭

遙授李思齊江西行省左丞誥

朕起布衣除暴亂救民於水火之中其有能知天命所在帥衆來歸者朕每嘉焉爾李某當元運之衰奮自汝南擁兵而守秦隴積年屯戍志在保民及我師入關乃西往臨洮已而率其士馬之衆納款轅門去危而就安轉禍而為福視彼暗於事幾殘民以逞者相去遠甚可

謂通時達變之豪傑矣茲授左轄於外省列之朝班仍給其祿爾尚夙夜恪慎思保令名以稱朕優禮之意爾其懋哉

侍御史王居仁除山西行省參知政事誥

國家之建行中書所以控制方面而布宣政令者也況河東山西之地古為雄藩所轄州郡不翅六十有餘版籍之廣民庶之繁其事亦云夥矣邇者鑄印開省未設丞弼先命近臣為叅知政事奏辟官屬以行則是大小

之務皆得專達非止參預而已也與斯選者非得勛舊  
之臣曷足以重其任哉具官王某才足以匡時謀足以  
經遠自渡江以來委身事朕凡十五年踐揚中外多著  
勞烈執法中臺聲聞益著於是簡在朕心俾躋政府鳴  
呼陳紀立經爾尚膺藩宣之寄安邊靖國爾其盡撫綏  
之方往惟汝諧毋替朕命

同知臨洮府事班景道除陝西行省參知政事  
誥

陝西在古為雍州之域三秦之地延袤一千餘里土廣  
物殷號稱難治朕嘗建行中書設叅知政事以綜覈衆  
務以鎮安萬民然必得同寅協恭之臣共釐治之則事  
集而功成不難矣具官班某負倜儻之才抱經濟之畧  
朕嘗歷試其為人設施次第綽有可觀故自臨洮別駕  
特授以叅預之職夫別駕四品之秩也較之叅預之資  
實超十階豈不以爾韞此奇才故不次而用之乎爾尚  
夙夜惟勤思稱朕懷官政之有弊者爾當振而新之民

瘼之未瘳者爾當撫而摩之則予一人汝嘉爾其欽承  
朕言不再

擬誥命起結文

凡一章

吏部尚書

程能而議功定勲而頒爵此皆選部主之所以古者寘  
於五曹之右重其任也蓋國家之治在於得人得人之  
盛繫乎銓衡者甄別其能否則天官之選可不慎歟  
具官云云爾尚允釐百工以熙庶績名器之崇卑爾當

慎其注授之方流品之清濁爾當展其激揚之志時惟  
稱職汝往欽哉



文憲集卷一



總校官庶吉士臣侍朝

校對官中書臣王鍾泰

謄錄監生臣張鱗